

四庫全書

集部

欽定四庫全書

集部

竹齋集

卷下
續集

詳校官編修

臣 翟 槐

中書臣劉源溥覆勘

總校官編修

臣 王燕緒

校對官中書

臣 石鴻緒

謄錄監生

臣 史廷璵

欽定四庫全書

竹齋集卷下

明 王冕 撰

七言古體

葛仙翁移家圖

青山無雲白日遲仙翁移家何所之或以丹砂到勾漏
或為家累遭驅馳烏捷背上妻與兒顧盼未解知其歸
仙翁讀書自怡怡坐穩不覺路險巖牛羊猶狗先後隨
老奴老婢俱忘機仙翁去就無不宜豈以偷生辛苦為

君不見風水洞前草離離
淡烟寒雨愁淒迷
又不見雲門長松啼子規
春風落花事已非
神仙有無吾未知
人生有酒且自持
秦皇漢武徒爾為

孫元實春遊圖

先生讀書不閉戶
坐閱鴻濛窺太古
衣冠滿酒武前修
禮樂從容出東魯
文章光燄駕李杜
李杜後來稱獨步
談辯風生四座春
胸中別有天台賦
相逢抵掌不露機
却說少年騎馬時
春光澹沲隨所之
好山好水多賦詩

轉首東風吹馬耳猶記松陰調綠綺杖藜不憚步行遲
孰謂畫圖無乃是我生山野無所謀白日灌園夜飯牛
安得先生與之游買酒共上黃鶴樓

四牧圖戴嵩畫

牧兒小職奚以為力耕得暇則放之浴流食青隨所宜
豈同人牧潛危機重爵厚祿那自欺坐看敗肉加鞭笞
何如牧兒心坦夷出入自在無羈縻高林雨晴白日遲
平原春暖芳草肥牧兒樂事從可知釣魚吹笛怡怡而

牛犢茁壯長厥肥老我亦有豐年期披圖載頌四牧詩
龔黃召杜今是誰

夏節士

夏石巖雲間人浪遊得教授北方在郟郢伯
太師在相位郟受戮夏先生知其無罪而死
屢上言宰相宰相奏請于上昭雪郟罪復其
舊有夏不受官郟子年賜米幣若干兼與扁
舟一葉放遊湖海間名飛雲軒世稱節士揭

曼石作傳名賢多為賦詩

夏侯先生天下士風流倜儻忠義俱平生勲業能自知
腹內更有非常書浪遊不廢燈火讀騎馬兒郎空碌碌
王門講道三十年坐使窮荒移國俗浮雲蔽日客夢單
勇銳欲食奸臣肝徑持白事上天子不顧宰相與何官
沈寃昭雪清四海舊時枝葉生光彩至今長安諸小兒
拍手為之歌慷慨歸來弗受大官名五湖一葉扁舟輕
丹青徒寫蘓子卿黃花自友陶淵明老我論交苦不早

意氣相期且傾倒讀公佳傳誦公詩江南節士如公少

送沙德潤之鄆城

公昔新著進士衫道酣氣岸清且髯政事堂堂史冊載
威儀肅肅民具瞻光風回春靄芳草剝水殘山振枯槁
至今吾鄉諸父老去思劇口談公好當時進士幾百人
奔趨袞袞登要津時雍所溉聖澤厚仕宦未有如公貧
公之家世秉周禮伯叔兄弟官濟濟飲冰食蘗二十載
濁涇終不汙清渭而今四海樂太平天子堯聰明臺閣

諸老皆老成豈不與公書大名鄆城絃歌固非左達以
長官無不可故人天上待公來繡衣白簡青驄馬

曹雲西畫山水圖

前年常見雲西畫今年始識雲西翁文章驚世世所重
筆力到老老更工流水涓涓石鑿鑿一嘯長才風雨作
豈云筆底有江山自是胸中蘊丘壑昨日亭東白雲起
帳望吳松滿江水安得先生乘興來寫我江南雪千里

贈寫照陳肖堂

君不見鑑貌但鑑影寫貌難寫心霍光鄧禹在臺閣嚴
陵魏野居山林功名道德照千古不特肖貌傳至今固
知寫貌易心難狀之妍醜筆可得至理不在顏色間陳
君筆力異衆史相貌既同心亦似昨日忘機入城市草
衣著我丹青裏氣爽神清誰比擬雪霽梅花映秋水黃
童白叟指點看此老不是儒生酸陳君陳君容我間莫
教添上貂蟬冠

水仙圖

寒風蕭蕭夜入戶渺渺雲飛水仙府仙人一去不知所
池館荒涼似無主江城歲晚路途阻邂逅相看顏色古
環佩無聲翠裳舞低徊欲語情悽楚十二樓前問鸚鵡
滄海桑田眯塵土王孫不歸望湘浦芳草連天愁夜雨

棠梨白練圖

芙蓉香冷簫聲杳月淡烟青楚宮曉仙禽不語雪衣輕
相逢却恨秋風早土花翠淺霜露濛山梨小結丹砂紅
主人醉倒不知春夢回故苑寒雲濃

蘆花道人換被圖

高昌野人見幾早髮須不待秋風老脫身放浪烟水間
富貴功名盡除掃坐對漁翁交有道青綾何似蘆花好
從時拜賜蘆花人自云不讓今古貧高眠聽夢夢更真
白月滿船雲滿身起來拍手波粼粼款乃撼動人間春

秋山圖

前年放船九江口秋風獵獵吹蒲柳買魚沽酒待月明
不知江上青山走三更吹笛欲喚人溥溥白露侵衣巾

故鄉遙遙書斷絕空見過雁如飛雲去年却下七里灘
秋水滿船秋月寒子陵先生釣魚處荒臺直起青雲端
先生不受漢庭官自與山水相槃桓至今高節敦廉頑
清風凜凜誰能攀泊舟登岸行復止徑雙岐通草市石
林遠映樹青紅正與今年畫相似茅廬半住林木裏白
狗黃雞小如蟻翁媪無言童稚間可是太平風俗美清
水初落魚鱗新東鄰釀熟呼西鄰相牽相把意思真親密
不異朱陳民李端筆力能巧妙寫我舊日經行到豈是

老夢眩水墨不覺掀髯發長嘯殷家大樓滄海頭留我
十日風雨秋觸景感動客邸愁便欲卜築山之幽斷橋
流水無人處添種梅花三百樹直待雪晴冰滿路騎驢
相逐尋詩去

送無咎遊金陵兼簡丁仲容隱君

長松撼空風怒號門前大水推斷橋山中坐雨六十日
不知野草如人高今晨出門天氣好眨眼忽驚春事老
楊花散作雪滿溪送客俄然動懷抱金陵六朝古帝都

古時風景今何如，珊瑚無根土花碧。
露團玉樹生流珠，江山無人隔塵土。
丹鳳不來孤燕語，上人脫洒無滯留。
抵用登臨重懷古，世人往往乘險機。
老我白髮無能為，道甫問訊丁令威。
有鳥有鳥何如歸。

松雪畫馬圖

玉堂學士金閨彥，磊落襟懷書萬卷。
等閒貌出天馬駒，鬃鬣蕭梢氣雄健。
蹄如削玉耳削筒，目光炯炯磨青銅。
五花連錢雲影動，噴沫一嘯生長風。
我昔曾上桑乾嶺。

帶甲騎來霜月冷只今潦倒巖谷間展卷令人動深省
江山漁隱圖

隔江青山青欲流江雲洗盡江風秋幽人小艇江上游
碧波萬頃無白鷗我知幽人愛瀟洒豈是機危鷗不下
浩歌喚酒來船頭笑殺桃源種桃者

送暨陽同知

我生山野毛髮古不是多時舊巢許松根坐卧忘歲年
足跡何曾入官府雨晴忽覺草添肥春來春去都未知

耕田鑿井亦足樂短歌長嘯隨所之溪谷無塵人事少
縱有饑寒能自保花村月夜犬不驚可是太平風俗好
昨日柳花如雪飛今日作詩何所思我詩似質朴君政
從可推錦衣翩翩馬如練拜恩應到黃金殿他年阜蓋
下蓬萊更與君侯作佳傳

錢塘紀行

廢苑荒涼官樹老春雨濛濛長芳草翠石玲瓏綰毒蛇
土花亂貼榆錢小猶憶建炎南渡時五雲護擁蛟龍旂

金輿玉輦事游幸名花不待東風吹紫霞蒲萄動春浪
腰鼓騰雷盤錦杖千官景從軒冕入歌聲婉轉青天上
閭闔新啟銅龍樓長江萬里為鴻溝中原北望草木秋
王孫不識山河愁垂衣東南成至治百五十年真夢寐
只今往事漫蒿萊文物衣冠俱掃地西湖水昏迷釣船
南屏月冷啼杜鵑咸平元祐事茫然梅花楊柳俱忘言
鄂州老將呼不起石塔如壺枕江尾行殿白日古燐飛
游子無言淚如水

漆樹行

東園漆樹三丈長綠葉花潤枝昂藏蟲蟻不食鳥不啄
皮膚破碎成瘡瘡野人摩撫重太息受辱匪因臨道旁
九天降氣疏澁液大家小家來取將陶盆紙籠攢待滿
手中白刃磨秋霜沉薰時令值肅殺苟無正性安敢當
所願天下盡光澤豈辭一身多損傷君不見西郊樗櫟
百尺強薜荔裹縛螻蟻房此物安可升廟廊

癸巳春二月下泚客有過余草堂出示李

太守之詩余奉而誦之已而問曰太守何如也
客曰太守公平正大和易近民而民歸之蒞政
未晷月上官委守城郡帥吾民從之民之從有
如子之趨父事也迨今歷三時犯霜露與民同
勞苦城將完上官禮之鄉民德之歌頌之聲不
絕真有古賢人之心誠吾民之父母也余聞客
言喜而歎曰何斯世而有斯人也耶且今之輔
世長民行古之道者鮮矣以古之道化今之人

者為尤鮮吾太守有古人之心行古之道能
化今之人真可謂不世出之才矣余鄉民也
聞太守之風起敬起慕遂寫梅作歌以上雖
不能紀功德之萬一亦可以述鄉民頌公之
政云爾歌曰

草堂昨夜春風起萬樹梅花月如水相過誰解論襟期
吾州太守山東李太守自是文章公文章政事皆從容
長身玉立冰雪胸標致政與梅花同梅花清苦良自守

不逐尋常好花柳廣平心事抵須論太守自是調羹手
我知太守節義高混同版築非徒勞版築乃是宰相事
濟川舟楫隨時操他日功成賦歸去溪山風月情如故
安得載酒草堂來歲寒同看梅花樹梅花別有天真趣

題申屠子迪篆刻卷

重刻繹山泰碑二
石於紹興路學

我昔聞諸太古初馮翊官官安可摸自從庖羲得龍馬
奇偶變化滋圖書結繩之政由此毀蝌蚪鳥跡紛紜起
後來大小二篆生周稱史籀秦誇李只今相去幾百年

字體散漫隨雲烟岐陽石鼓土花蝕繹山之碑野火然
縱有秦銘刻岑石冰消雪剝無踪迹書生好學何所窺
每展史編空歎息樊山先生東魯儒好古博雅耽成癰
八分小篆純古法鑿石置之東南隅白石光芒爭照耀
滿城走看嗟神妙向來傳寫何足珍棗木空貽後人誚
徐公手摹烽火塵金陵近刻殊失真那如此本意態淳
丞相李斯下筆親申屠墨莊有傳授法度森嚴非苟苟
豈惟後學得所師萬世千秋垂不朽

雪中次韻答劉提舉

朔風撼天雲黯黯雪花恰似楊花糝憑高無以辨青紅
四海九州同一覽枯腸頗恠酒力薄勁氣著人寒慘慘
痿痺不覺手足彊爭戰俄驚牙齒喊上天下地無痕瑕
萬路千岐迷坎塹山林隨處見梅花汀渚殊難認蘆葦
東郭先生氣宇清南征老將顏色黤蒙鞍誰剝猛虎皮
摘珠競探驪龍頷黃河鐵牛僵欲倒取而啖之吾豈敢
且將清夢托楮生焉用栖身重毳毳踈狂夜起不著巾

短髮正如童子髡開牕忽見四山入月色爛森銀茁茁
玉壺凍結花漏漉戍鼓轉更聲紉紉此時忽想括蒼翁
應是清冰生肺膽興酣直上百尺樓天上星辰必親擊
平生自有澄清志要使齊民無穢掩殺奸除暴盡忠義
坐令豺鯁成蘆醢夫何混雜草木中冰團沍合銜悽惜
不如買却金豪曹且置蒲萄千百坎君歌我和縱高情
痛掃華腴歸古淡無知笑殺楚三閭安用離騷寄悲感

江南婦

江南婦何辛苦田家淡泊時將暮敝衣零落面如土饑
彼南畝隨夫郎夜間績麻不上床績麻成布抵官稅力
田得米歸官倉官輸未了憂枵腹門外又催私債促大
家揭帖出陳帳生穀十年還未足長兒五歲方離手小
女三周未能走社長呼名散戶由下季官鹽添兩口舅
姑老病毛骨枯忍饑忍寒蹲破廬殘年無物做慈孝對
面冷淚空流珠燕趙女兒顏如玉能撥琵琶調新曲珠
翠滿頭金滿臂日日春風嫌酒肉五侯七貴爭取憐一

笑可得十萬錢歸來重藉錦繡眠羅帷暖擁沈麝烟

送人上燕

燕山三月風和柔海子酒船如畫樓丈夫固有四方志
壯年須作京華遊京華名花大似斗看花小兒競奔走
蒲萄嫩灑金叵羅羊尾駝峯膩人口知君慷慨非膏粱
生銅卧匣韜光芒出門一笑頗自許光範不用投文章
玉露紅門天尺五要為蒼生說辛苦得時便覓好官歸
行道當依聖明主我將細釀松花春明年此時當遲君

遲君不問官途事要知伊傳何如人

陌上桑

陌上桑無人采入夏綠陰深似海行人來往得清涼借
問蠶姑無个在蠶姑不在在何處聞說官司要官布大
家小家都捉去豈許蠶姑獨能住日間績麻夜織機養
蠶種田俱失時田夫奔走受鞭笞饑苦無以供支持蠶
姑且將官布辦桑老田荒空自歎明朝相對淚滂沱米
糧絲稅將奈何

大醉歌

明月珠不可襦連城壁不可鋪世間所有皆虛無百年
光景駒過隙功名富貴將焉如君不見北邙山石羊石
虎排無數舊時多有帝王墳今日纍纍蟄狐兔殘碑斷
碣為行路又不見秦漢都百二山河能險固舊時宮闕
亘雲霄今日原田但禾黍古恨新愁迷草樹不如且買
蒲萄醅携壺挈榼間往來日日大醉春風臺何用感慨
生悲哀

江南民

江南民誠可憐
疫癘更兼烽火然
軍旅屯駐數百萬
米粟斗直三十千
去年奔走不種田
今年選丁差戍邊
老羸饑餓轉溝壑
貧富徭役窮熬煎
豺狼左右虎後先
況爾不肯行楮錢
楮錢不行生禍愆
官司立法各用權
生民自此多迍邰
君不見海東風起浪拍天
海中十載無漁船
人不見淮南格鬪血滿川
淮北萬里無人烟
通都大邑盡變遷
新鬼舊鬼皆銜冤
今上聖明宰相賢
政如日月

開堯天大布德澤清八埏百辟忠義何以言捐生棄死
非徒然我在畎畝心拳拳無能與爾扶顛連老眼迸淚
如飛泉

花驢兒

戊寅歲杭州有回回人牧花驢兒能解人意
能識省回回人語言人多觀之回人以此多
獲利焉

花驢兒渡江踏遍江南土正值江南無馬時驢兒得志

雄威武況是能解花門語江南淫雨二百日洪濤巨浪
掀天舞麻麥爛死秧苗無百姓吞聲苦饑苦驢兒嚼粟
恬如故江南子弟不曉事擲金馳逐爭先覩誇渠省得
人語言縱使能言亦何補花驢兒乃奇過昨朝方上評事
廳今日又登丞相府哮吼縱橫誰敢侮老夫平生不信
恠見此恠事欲嘔吐歸來十日不食飯扼腕攢眉淚如
雨

過山家

松風吹涼日將宴山家蒸梨作午飯阿翁引孫牽犢歸
破衣垂鷄不遮骭勾鑣揜腰背負薪白頭半岸烏葛巾
喜渠胸次無經綸白石爛煮空山春見我忘機笑古怪
不學當時野樵拜自言無處著隱居僅得門前溪一派
好山兩岸如笑渠可濯可漁白日力作夜讀書鄰家鄙
我迂而愚破瓶無粟妻子悶更采黃精作朝頓近來草
廬無卧龍世上英雄君莫問

宣和殿畫水仙鵲圖

玉宇瓊樓天宮春融紫禁烟花繞龍光搖動五色雲
忽覺青蒲生野草河圖埋沒龍馬藏上林桑穀一夜長
丹穴豈是無鳳凰鵠乃來天子堂春秋筆削以為異
未必宣和知此意長白山下風蕭蕭吹暗沙塵塞天地
宮中仙子羅衣垂露傾金盞愁欲悲綠烟不開花夢冷
此時顏色非曩時轉首桑田變滄海景物淒涼畫圖在
江南江北不相知展卷令人空感慨

喜雨歌為宋太守賦

南州六月旱土赤炎官火傘行虛空田疇圻裂河海涸
萬物如在紅爐中桔槔不用計已枯農民踏踏愁歲凶
蓬萊太守民父母下顧赤子心忡忡罄竭精神扣天府
話語直與天神通須臾喚起龍井龍大澍三日蘓罷灑
百姓喚作太守雨東臯西陌皆冲融禾苗陡覺充秀實
野草亦解回顏容吾儒能效東哲賦喜見屋底山雲濃
隣家父老走相報門前大水如奔洪妖氛穢穢俱洗盡
此是太守造化功太守正與造化同百姓拍手歌年豐

歌年豐太守德澤垂無窮

送林叔大架閣上京

林君家世重詩禮冠蓋東南官濟濟三年參幕小蓬萊
爛漫文章照山溢自公退食趣有餘好古博雅耽文儒
牙籤玉軸照窓几名花翠竹羅庭除開簾放春景物俱
湖山四面如畫圖掀髯長嘯塵事少神仙官府真吾居
轉首京華天尺五暫離堂前彩衣舞青驄馬嘯楊柳風
黃河水落桃花雨天上故人相笑迎碧蒲萄酒滿盞傾

忘形爾汝恣歡譁連床可話燈窓情省臺求賢張治具
知君快展青雲步有懷若問草堂翁門外梅花三百樹

題墨梅送宋太守山東運使

大唐丞相宋廣平文章事業昭汗青心腸耿耿磨鐵石
賦梅賦得梅花情嗟哉梅花太清苦不與杏桃同媚嫵
空山歲晚人迹稀縱有清香為誰吐蓬萊太守丞相孫
愛梅亦與梅為隣冰雪滿懷不染塵坐令陰谷回陽春
羅浮山遠雲水隔瑤瑤玻璃霜月白南枝瀟洒北枝清

野草間花驚德色蓬萊太守詩夢回霜華點點飛瑤臺
玉堂早報消息好天子又喚調鹽梅

有感

春風花開洛陽縣此處與子初相見亂離相去五十秋
我髩星星子皺面莫言今日重淒涼且說當年與華宴
細腰皓齒供奉歡金鼎玉盤羞美饌尊前貴客覓大書
左右從官催進絹一時豪放無檢束人立下風爭健羨
而今此興竟蕭條但見長江淨如練寒烟衰草蓬萊宮

冷月淒風廣寒殿喚鷹羌郎聲似雷騎馬小兒眼如電
總如無知癡騃子也逞虛威撚弓箭老儒有識何以為
空指雲山論文獻君不聞一從趙高作丞相吾道凋零
如韞線

題陳象賢竹素圖

君家竹素園異彼篋簞谷插架牙籤三萬軸卷藏東觀
吞天祿清風明月時往來紅塵不墮香芸堆蚪蚪鳥跡
一玉開懷幽抱密真奇哉炙汗不流珠光重信知龍種

皆書種黃鍾聲徹鳳皇嘯玉杯光燄麒麟動十年不下
君子堂燈火夜靜聲琅琅歲寒節操固自常厭看花柳
爭春忙金谷平泉暗烟雨兔麥孤葵無定主何如竹素
園簡編且容與玉振金聲千萬古

寄太素高士

我昔扁舟上耶溪尋君直過丹井西長松月冷啼子規
春風滿地芳草齊樓殿玲瓏金碧涌鐘雲不出松雲重
老猿掬澗山影亂翠禽啄露岩花動此時相見不作難

握手笑上松花壇壇下十萬青琅玕空陰漠漠常風寒
我對青山論今古青山茫茫無一語知其與我忘爾汝
石瓢酌我雲根亂冷然使我肝膽清飄裾欲度浮雲輕
千峰回影陷落日萬壑欲盡松風聲回首溪山忽成別
幾見江梅飛白雪洞庭湖上聽夜雨仲宣樓頭望明月
玃玃對景傷古情寸心欲吐書難憑何當相晤一抵掌
與君細看真蘭亭

寄昱東明

浮清閣上山如簇浮清閣下泉如玉浮清主人瘦如竹
襟懷卓犖無點俗相逢一笑不話禪自道住山三十年
石杯酌茗搜我枯石牀掃苔留我眠雲深不聽雞戒曉
山風落澗松花老歸來耕田忘歲時池塘幾度生青草君間
一尺素我老雙鯉魚共此片月光各在天一隅昨夜扁
舟欲飛去雪雲凍隔耶溪路千巖萬壑不可尋夢魂空
繞長松樹

悲苦行

悲風吹沙墮空屋老烏號鳴屋上木誰家男子從遠征
父母妻孥相送哭哭聲嗚咽已別離道旁復對行人悲
去者一心事悲者百感隨前年鬻大女去年賣小兒皆
因官稅迫非以饑所為布衣磨盡草衣折一冬幸喜無
霜雪今年老小不成羣賦稅未知何所出昨夜忽驚雷
破山北來暴雨如飛湍此時江南正六月酸風入骨生
苦寒東村西村無火色癡雲著地如墨黑瞶翁瞽嫗相
喚忙屋漏床床眠不得開門不敢大聲語門外磨牙多

猛虎自來住此十世餘古老未嘗罹此苦我感此情重
歎吁不覺淚下沾裳裾安得壯士挽天河一洗煩鬱清
九區坐令爾輩皆安居

猛虎行

去年江北多飛蟲今年江南多猛虎白日咆哮吓行人
人家不敢開門戶長林空谷風颼颼四郊食盡耕田牛
殘膏賸骨委丘壑觸懷嘯雨無人收老烏銜腸上枯樹
仰天烏烏為誰訴逋逃茫茫不見歸歸來又苦無家住

老翁老婦相對哭布被多年不成幅天明起火無粒粟
那更打門苛政酷折骸斷肘無全民我欲具陳難具陳
縱使移家向塵市破獍狻猊喧成羣

勁草行

中原地古多勁草節如箭竹花如稻白露洒葉珠離離
十月霜風吹不倒萋萋不到王孫門青青不盖讒佞墳
游根直下土百尺枯榮暗抱忠臣魂我問忠臣為何死
元是漢家不降士白骨沉埋戰血深翠光漱艷腥風起

山南雨暗蝴蝶飛山北雨冷麒麟悲寸心搖搖為誰道
道傍可許愁人知昨夜東風鳴羯鼓鶻鶻起作搖頭舞
寸田尺宅且勿論金馬銅駝淚如雨

贈蔣清隱

門外好山千萬重翠濤百頃羅雲松細水幽回雜花遠
三逕脩竹來秋風靈籟泠泠動清操世外紅塵飛不到
白月流光抱石臺高人瀟爽長吟嘯起居間間趣有餘
看山看水還看書木瓢滿酌示真率不知軒冕為何如

太華終南青未了北山移文為誰道君不見孤竹夷齊
久寂寥首陽薇蕨今荒草

送元本忠北上

天台有奇觀方廣石梁懸斷岸青天倒瀉瀑布寒五百
大士皆頑漢道人一出初無心手翻貝葉開珠林十載
湖山玩清淡白雲流水松風琴金策飛來鏡湖月大禹
山前看禹穴玉塵橫揮簷蔔香石臺花雨如飛雪千山
奇怪總筆底妙語寫出山骨髓岩泉一勺不足留夢魂

飛渡魚龍海皇州三月花柳輝江南此時茶笋肥君行
已隨心所向不嫌杜宇啼春歸玉堂故人知我有問信
向君應合手為言百事不能為舊時黑鬚今白首

有感

江南古客無寸田半尺破研輸租錢好山好水難賣緣
荃房日薄蒙荒烟囊中蚪蚪二百年大經大法垂幽玄
他人不知我自憐落花春暮啼杜鵑杜鵑啼苦山竹裂錦官
宮殿烟霏滅人間百鳥無處栖青蠅貝錦成行列北望

茫茫莎草黃
蔥河五月天
雨霜岐陽不
見真鳳凰
山鷄野鷺爭
文章江南古
客苦無計却
向水中牽薜
荔沙鷗夢老
蘋雨殘濕雲
不動天如醉
回觀蓬萊十
二樓我曾讀
書樓上頭樓
前平碧千頃
秋白露暗洗
芙蓉愁歲寒
歸來有誰在
青松是兄梅
是弟山中巢
許不可尋却
對老嵇食石
髓

蝦蟆山

在海口石狀如蝦蟆前古傳言為太倉之耗令下鑿去石口其鑿遂消然此怪

事非吾儒所道比興賦之以記時事云

春風吹船著牛輓

牛輓潭在蝦蟆山下

扶藜直上山之脊山上老

石怪且頑皮膚皺皺苔花碧我來不知石有名拊摩怪

狀心亦驚野人指點為我說此物却是蝦蟆精古昔曾

偷太倉粟三百餘年耗中國天官燭其陰有毒勅丁破

口劉其足至今突兀留山丘雨淋日炙無人牧樹根穿

尻蛇入肚老鴉啄背狐糞頭牧童時時放野火耕夫怒

擊樵夫剝自從殘墮不能行見者唾之間者罵蝦蟆蝦

蟆非令僕無功那竊天之祿如今蝦蟆處處有天官何

不夷其族致令驕氣吹臊腥干霄上食天眼睛百蟲啗
盡心未已假作鼓吹怡人情三月江南春水漲紆青拖
紫爭跳浪漁父持竿不敢言獵夫布弩空惆悵黃童白
叟相引悲田中更有蝌蚪兒

金陵行送余局官

李白題詩舊遊處桃花楊柳春無數六代衣冠委草萊
千官事業隨烟霧大江西下秦淮流石頭寂寞圍荒丘
原田每每盡禾黍青山不掩諸公差高樓如天酒如海

觸景令人生感慨紅墮香愁燕子飛風流王謝今安在
我欲去尋朱雀橋淡烟落日風蕭蕭交疏結綺杳無跡
但見野草生新苗小兒紛紛競豪縱區區割據成何用
芙蓉水冷燕支消千古繁華同一夢傷今弔古如之何
頭上歲月空蹉跎君行喜有絲五紵宦情不似詩情多
江南故事可知否白雲翼翼變蒼狗休論平生錦機手
浩歌且醉金陵酒

天台行

東南海澗秋無烟天台山與天相連丹霞紫霧互吞吐
重岡複嶺青盤旋怪石長松磊磊今落落神芝靈草綿綿
芳芊芊金堂玉室異人世桃花流水春娟娟送君此去
意何古幅巾颭颭衣翩翩檄書初開雲五色不嫌坐上
寒無羶我擬尋真拾瑶草在家作想三十年乘風幾欲
鼓舞去水流花謝難賁緣山空無塵明月冷時復夢裏
聞清猿君今登登玉霄近為我問訊丹丘僊丹丘僊人
如有在我欲往受長生篇爛煮白石松下眠

索笋長句寄傅隱居

春風吹起石底雲豐隆喚出蒼龍孫古苔初破土膏滑
露華淨洗龜筒痕先生愛笋如愛玉冷笑人間飫膏肉
我生無家懷此君十年未解求一束先生卜築江之干
軒窓蕭洒鳴風湍玉麈不揮秋颯颯翠佩欲動聲珊珊
高歌不覺凜毛髮坐令異境生清寒便欲契青奴謝彼
苜蓿盤先生若肯慰我之大嚼我亦為之披腹呈琅玕

望雨

狂風吹春無寸雨天地漫漫盡黃土病日韜光赤如血
千花萬花愁不語耕牛渴死野草枯農夫悲啼淚如珠
蠶胎在紙秧在穀未知何以供官輸道旁流民盡游鬼
十日不食一粒米唇焦口燥聲啾啾抱甕沿門求剝水
孰云綺席羅奇珍龍涎入鼎烟如雲笙歌滿耳珠翠擁
醉飽那識人間貧江北豺虎毒又見江南狼虎簇饑狐
日食餓死屍老烏夜叫逃亡屋我冠腐儒空讀書騎馬
小兒真苟圖安得銀河傾澤我枯槁蘓坐令四海常晏

如

感竹吟

雲溪老竹持苦節玉質蕭森出巖穴蒼蒼古色誰為摩
凜凜清風自然別勁直不肯降雪霜瀟灑不肯栖鳳凰
願殺長身載經籍要為吾道垂休光誰信鷲風滿滴俗
紅紫紛紛亂人目遂令此君受羈束荆棘凌夷刀鋸辱
青蟲網葉蠹食筠野老更欲鉏其根閉塞陽和絕土脉
絕之不許生兒孫東里先生有遺族午夜聞之皆痛哭

擬以餘音問伯夷首陽烟雨莓苔綠嗚呼老竹老愈奇
歲寒心事無人知孤梅在溪松在壑焉能與余論襟期
飄聲夜落山陰道欣賞多情愁欲倒固知遇合各有時
何必區區掛懷抱君不見窮陬荒草非所種開花猶解
供王貢那有此材無此用

結交行送武之文

江南野人毛髮古騎牛讀書無一侶白眼遙看泰華雲
赤脚冷濯滄浪雨長安小兒不足數論交忽有東平武

武君胸中氣崢嶸呼吸雲夢吞滄溟筆底春秋決王伯
坐探今古無餘情青春揚舠渡淮海江山秀色遙相待
雄文卷盡九江碧新詩寫出廬山翠西南五老青未了
倏忽騎雲過蓬島脫畧不作公子行隨我騎行踏芳草
人怪我顏何醜老自覺無人可同調梅花明月柳花雲
獨對青山發長嘯武君過我笑我癡話言時復投其機
柴床卧聽夜雨落草窓坐看秋螢飛淒涼飲盡客中味
君知我知誰復知今年丙子旱太苦江南萬里皆焦土

老羸餓死壯者逃碩鼠欺人暴如虎武君平生多抱負
對此如何可輕舉武君武君善調護慎勿輕身學巢許
秋風昨日吹大荒草木黃落雁南翔浩然歸興不可降
嚴君五馬一馬黃大兄亦授七品郎況是遷官歸故鄉
可知閭里生輝光我窮衣袖露兩肘回視囊中無一有
送君不勸陽關酒長歌但折江上柳丈夫有志當自持
不須重此生別離淚不為此生別滋天南天北同襟期
明年平原芳草綠試弓好射銜花鹿有懷若問山陰竹

中天亦有南飛鵠

謝友惠溫生筆

春雲浮空山渺渺細雨飛花墮江草感時欲作寄遠書
凝思幾歎中書老東家小胥借已無西家但有長柄鉏
薛濤側理攤滿案無奈點作玄雲圖昨夜燈花懸紫粟
知有春風到茅屋清晨開戶得故人惠我溫生雙落墨
赤鋒圓健光彩浮金花古牋封兩頭脫穎忽作霹靂響
龍跳虎躍山靈愁更看擔夫爭道好塗鴉小兒驚絕倒

陶泓從此策奇勲
扼腕凝神聽揮掃
黑花颯颯鳴琳琅
野人辟易安敢藏
為君貢之白玉堂
黼黻華袞開天章
大書大義扶王綱

謝曹隱君惠扇歌

去年僦屋在山脚
草居兩間如蠅殼
六月七月無雨落
田野焦枯江海涸
人間酷烈無處逃
吾農忍氣嬰魚熬
編蒲緝羽不成扇
尋松訪石空勞忉
至今悵鬱未能雪
想到那時腸內熱
先生何以知此情
贈我齊紈比明月

番羅夾背紫竹把中有水墨新圖畫崩灘亂石奔驚湍
依約遠山左右攢輪囷老柏飽雪霜更有石丈依修篁
歲寒節操不可降未舉已覺生清涼山陰野人何磊落
笑引南薰歸掌握寒聲颯颯動巖壑不羨右軍題六角
轉手黃埃淨如掃便將獻君明大道置諸懷袖揚仁風
快與蒼生除熱惱

贈楊仲開畫圖引

楊君綽有隱者風鬚長骨瘦兩耳聾作詩作畫不作意

造化不與常人同前年眼健腕有力捉得老龍歸雪壁
墨雨淋漓天地黑茅山十日飛霹靂去年神固氣宇壯
長驅猛虎來堂上威雄哮吼萬夫栗滿屋生風洗蠻障
今年忽爾寫雁魚氣韻又與曩日殊平湖大澤無界限
黃蘆白水秋烟孤魚游不失倫鴈來不失序飛鳴泳躍
千萬狀立意俱由是為主嗇夫一見大義明無聲詩是
無文經今人幾許浪得名豈研古人之畫情楊君楊君
一笑起無奈賤目而貴耳宋人固以燕石奇夫差酷愛

西施美燕支牡丹荔子圖豪家割舍千金沽雲林雪嶽
盡埋沒王吳荆李為何如安得我有絹萬丈聯成一片
青天障請君畫作風調雨順圖共樂太平歌擊壤

賈浪仙騎驢圖

雪花打帽風攪鬚寬衣破靴騎蹇驢先生自是山澤癯
瘦名之傳豈為虛窮吟苦思不覺老知音幸遇韓京兆
至今長安諸小兒拍手猶能為君道清聲千古在世間
好詩句句誇浪仙我恨後生五百年不得抵掌談微玄

形骸孤陋向巖壑竹冠草衣空卓犖披圖挹之嗟寂寞
斷橋流水梅花落

柯博士畫竹

湖州老丈久已矣近來墨竹誇二李紛紛後學爭奪真
畫竹豈能知竹意奎章學士丹丘生力能與丈相抗衡
長繅大楮縱揮掃高堂六月驚秋聲人傳學士手有竹
我知學士琅玕腹去年長歌下溪谷見我忘形笑淇澳
我為愛竹足不閒十年走遍江南山今日披圖見新畫

乃知愛竹亦如我何當置我於其下竹冠草衣相對坐
坐嘯清風過長夏

秋夜雨

秋夜雨秋夜雨馬悲草死桑乾路雁啼木落瀟湘浦聲
聲喚起故鄉情歷歷似與幽人語初來未信鬼啾唧坐
久忽覺神淒楚一時感慨壯心輕百斛蒲萄為誰舉山
林豈無豪放士江湖亦有饑寒旅凝愁擁鼻不成眠繁
孤焰短寒花吐秋夜雨秋夜雨今來古往愁無數謫仙

倦作夜郎行杜陵若為茅屋賦只今村落屋已無豈但
屋漏無乾處凋餘老稚匍匐走哭聲不出淚如注誰人
知有此情苦秋夜雨秋夜雨赤縣神州皆斥鹵長蛇封
豕恣縱橫麟鳳龜龍失其所耕夫釣叟意何如夢入江
山毛髮豎余生聽慣本無事今乃云胡慘情緒排門四
望雲墨黑縱有空言亦何補秋夜雨秋夜雨何時住我
願掃開萬里雲日月光明天尺五

送章德遠教官自湘湖歸慈湖

我生不想圖凌烟草衣曲肱牛背眠早看紅日出海底
夜看素月懸中天陰陽推盪幾昏曉長嘯狂歌不知老
清泉白石自愉怡那信人間宦途好逍遙偶爾窮外觀
之子已在青雲端廣文坐上新彈冠蕭爽不作儒生酸
三年考績易官燭回首西風正黃菊白雲喜動故山秋
慈湖遙映湘湖綠君歸莫慮鐵研穿且力古道希聖賢
我歸不用君致言門前自有梅花田

送歐陽彥珍歸杭

金陵山勢如蟠龍金陵美酒玻璃紅對山酌酒却歌舞
坐笑前輩何英雄六朝遺跡漫烟霧鳳凰臺上秋無數
斜陽巷陌燕子飛秦淮西下長江去人生此會不偶然
眼前興廢何須言丈夫事業要磊落比較瑣屑非高賢
我知歐陽乃奇士喬木故家良有以文章五彩珊瑚鈎
肺腑肝腸盡經史盛時仕宦三十年東吳西楚情翩翩
解衣推食待豪傑氣義渾厚無雕鐫明朝乘興過南省
鶴背秋聲破秋溟紫薇花對明月高呼吸湖光數千頃

書生瀟洒未有家擬欲結屋青山阿故人若有歲寒約
為我載酒尋梅花

趙千里夜潮圖

去年夜渡西陵關待渡兀立江上灘灘頭潮水倒雪屋
海面月出行金盤水花著人如撒霰過耳斜風快如箭
叫霜鴻鴈零亂飛政似今年畫中見寒烟漠漠天冥冥
展玩陡覺心神清便欲吹簫騎大鯨去看海上三山青

明上人畫蘭圖

吳興二趙俱已矣雪窓因以專其美不須百畝樹芳菲
霜毫掃動光風起大花哆唇如笑人小花斂媚如羞春
翠影飄飄舞輕浪正色不染湘江塵湘江雨冷暮烟寂
欲問三閭杳無迹愴愴不忍讀離騷目極飛雲楚天碧

古時歎

箕子奴而比干死屈原以葬湘江水痛哭書生不見歸
朱董何人呼得起深衣大老為腐儒紉袴小兒稱丈夫
學士時為八風舞將軍日醉千金壺人間赤子苦鉗鈇

抱麟反袂空流涕嗚呼噫嘻不有祝鮀之佞宋朝之美
難乎免於今世矣

送汪用衡北上

去年送客西湖路芳草落花春已暮今年送客浦陽江
六月秋風吹柳樹年年送客為賦詩賦詩每以功名期
玉堂金馬等閒去朱衣紫綬笑取之歸來高卧良自鄙
此語云云成戲耳相如不是輕薄兒馬周終非窮途士
古人窮達各有守今人枵然何所有百寶粧腰逞豪俊

千金買馬誇疾走春風笑看陌上花
夜月醉眠蛾眉家
平生事業止于此旁人為爾何咨嗟
汪君汪君拔其萃
讀書論道真我輩江山萬里在胸中
洗却人間紈綺態
此行必奪錦袍歸
腕頭更佩金纍纍
若問今朝作詩者
竹冠草衣盤礴羸
商歌飯牛松下坐

老柏圖為張心田賦

高堂素壁無纖埃
上有老柏參天來
銅柯旁奮龍爪出
密葉暗擁玄雲堆
江干水落見白石
小竹無聲弄秋碧

君不見劍峰低空絕行跡
諸葛祠前二千尺霜皮溜雨
苔花蝕至今父老猶能識

雲麓漁舟圖

大山小山無寸青
長江萬里如月明
楚天不盡鳥飛絕
老樹欲動風無聲
何人方舟順流下
草衣箬笠俱瀟灑
蓬舟有兒能讀書
不是尋常釣魚者
玄真子陶朱翁避
世逃名俱已矣
後來空自談高風
我視功名等塵垢
何似忘言付盃酒
武陵豈必皆神仙
桃花流水人間有

對月

已卯八月十五夜天地萬里無雲烟明月忽自海底出
皎如玉鑑當空懸清輝歛灩破幽冥山河倒浸無餘景
丹桂香消白兔愁玉宇瓊樓不禁冷南箕北斗潛光華
江漢無聲流素波老夫於此興不淺有月無酒將奈何
天上誰觀羽衣舞人間那得清虛府世情乖異每變更
月色何嘗有今古秋風飄飄度瑩篴東家西家登大樓
相期翫賞醉終夕豈知別有窮途愁回首天涯故人少

白露淒淒下庭草欲持此意問嫦娥孤雁一聲關塞曉
芙蓉山雉圖

錦屏重重錦官宮錦官宮苑多芙蓉芙蓉花開仙子容
滿城歌館延秋風秋風吹涼度江潁江上月明人笑語
舉頭無限是青山富貴繁華定何許風雲變滅事已非
西宮南苑殊曩時荒臺野草氣慘慘翠筠冷雨秋離離
日暮簫聲動霄漢山雞起舞雲零亂孤懷回首不勝情
對酒令人發長歎

題溫日觀葡萄

日觀大士道眼空佯狂自喚溫相公浩然之氣塞天地
書法悟入蒲萄宮有時潑墨動江浦叱喝怒罵生風雨
草聖絕倒張伯英春蚓秋蛇何足數龍鬚倒捲鬼眼枯
枯藤脫落無根株多年明月喚不下爛葉搭架秋模糊
流沙渡頭聽鼉鼓滄海桑田事非古大士於此不露機
示人落落離言語只今相去數十年看書看畫心茫然
安得美酒三百船與君大醉西湖天

息齋雙竹圖

李侯畫竹真是竹氣韻不下湖州牧墨波翻倒徂徠山
筆鋒移出簣簞谷千竿萬竿清影遠百丈十丈意自足就中
分取一兩枝別是山陰瀟洒族踈梢颯颯鳳毛顫修幹
隱隱虬龍伏憑軒忽若秋風來坐使傍人脫塵俗我生
愛竹太僻酷十載狂歌問淇澳歸來不得翠琅玕聽雨
冷眠溪上綠而今已斷那時想見景何緣動心目便欲
為園真致之相對空窓慰幽獨

題金禹瑞畫松圖

畢宏韋偃遠莫追畫松得名今是誰黃巖太守誇絕倒
休寧縣令爭新奇蒼髯鐵甲風雷動浮雲散盡青天空
只因曾看讀碑圖至今多作營丘夢錢塘有道金隱君
風流不讓今古人文章學古畫師古落筆政似營丘親
前年為我畫松樹自然自有天真趣無人解識棟梁材
冷烟殘雨空山暮于今頽然老矣夫隔江不寄平安書
不得與之傾酒壺令人看畫長嗟吁

張御史西山雪堂

張君住近西山麓窓几虛明遠塵俗懸崖絕壁堆瓊瑤
疊嶂重巒隱青綠乾坤蕩蕩無痕瑕世上兒子何繁華
清高或作袁老夢標致不取陶家茶升高望遠忘世慮
寫字讀書皆有趣歲寒若以我為鄰與爾種梅千百樹
坐令此處春無數

司馬氏藏唐子華山水扇畫

近來山水畫郭熙江南獨數休寧令筆法精奇意態古

咫尺萬里開天鏡
巖頭老樹如老龍
隔湖喜見山重重
小橋依約野色遠
茅廬隱映林影空
門前礧石頭路荒
苔野草青無數往
來不見車馬塵政
似山翁舊居處
程伯休父司馬孫
風流文彩垂青門
平生愛書入骨髓
尺素寸楮無不存
我生所好亦殊絕
一見此圖狂欲跌
安得為招唐令來
添我梅花千樹雪

題夏迪雙松圖

我昔曾上五老峯
白雲盡處看青松
中有兩樹如飛龍

正與夏廸畫者同夏廸畫松得松趣箇箇乃是廊廟具
貞固不持凌雪霜偃蹇猶能吐烟霧蒼髯獵獵如有聲
錢甲半掩苔花青六月七月炎火生對此似覺形神清
丈人兀坐誠有道豈比商山採芝皓有琴屏却不須彈
而今世上知音少

題魏仲遠釣深軒

君家住處多幽趣繞屋琅玕淨無數蕭蕭清韻動天風
冉冉晴陰生綠霧湖山遠映蒼翠稠五月六月涼如秋

且開三徑待佳客抵用千畝論封侯況爾此君高節古
縱有雪霜那可侮平生正直少人知野草間花徒媚嫵
知君古意同古賢脫略傲笑情翩翩我生愛竹比君癖
櫛風沐雨三十年投老歸來舊溪曲竹色荒涼芳草綠
歲寒無以慰孤懷只有梅花在空谷聞君有竹心遑遑
便欲逕造君子堂安能為我羅酒漿月明吹簫呼鳳凰

對景吟

濕雲不飛山雪滿越王城頭鼓聲短曉來溪上看梅花

虎跡新移大如椀老烏縮項如凍鷺呼羣強作嬰兒啼
紅桃翠柳眼欲迷舊時紈袴今塗泥淮南千里無烟火
淮東近日多軍馬寸薪粒粟不論錢行客相看淚盈把
如何五陵年少郎賣田去買青樓娼吳歌楚舞不知夜
歸來也學山翁狂明朝酒醒入官府方知不是城南杜
落花風急雨蕭蕭索寞無言面如土

衛生畫山水

國朝畫手不可數神妙獨數高尚書尚書意匠悟三昧

筆力固與常人殊
林樹無根雲懵懂
崑崙泰華雲中湧
山城野店不逢人
碧波翠嶂淋漓動
于今絕響三十年
尚書筆法誰能傳
片藤尺青不易得
使我感慨心茫然
吳興老趙薊丘李
兩地清風俱委靡
古人丹青亦消毀
後學紛紛無乃是
衛生卓犖志有餘
妙齡聲譽馳江湖
泛觀今昔意未足
直與造化論錙銖
嗚呼安得有絹請
君畫竹冠置我長
松下坐看青山白
雲過

五馬圖

太僕濟濟唐衣冠五馬不著黃金鞍飲流繫樹各有適
未許便作駑駘看髭鬣蕭蕭綠雲茸噴沫長鳴山嶽動
世無伯樂肉眼癡那識渥洼千里種官家去年搜駿良
有馬盡拘歸監坊遂令天下氣凋喪驢騾駞爭騰驤
只今康衢無馬迹得見畫圖差可識畫圖畫圖奈爾何
撫几為之三歎息

吹簫出峽圖

巔崖峭絕撐碧空倒卧老松如老龍奔流落峽噴白雪
石角險過百丈洪我昔放舟從此出捩柁掛帆氣欲折
春風回首三十年至今認得山頭月草堂清晨看圖畫
畫裏之人間似我波濤洶湧都不知橫簫自向船中坐
酒壺茶具船上頭江山滿眼隨處游安得更喚元丹丘
相携共上黃鶴樓

關河雪霽圖為金陵王與道題

飛沙撈人風墮憤老夫倦作關河客歸來松下結草廬

卧對寒流雪山白悠悠如此四十年世情脫略忘間關
今晨見畫忽有省平地咫尺行山川鳥道連雲出天險
玉樹瓊林光閃閃陰崖絕壑望欲迷冰花歷落風悽悽
枯槎側倒銀河開三巴春色隨人來漁翁舟子相笑語
不覺已過洪濤堆溪回浦漱石齒齒溪上人家成草市
長林大谷猿鳥稀小步蹇驢如凍蟻西望太白日色寒
青天削出蛾眉山人生適意隨所寓抵須歷涉窮躋攀
明朝攬鏡成白首春色又歸江上柳何如高堂掛此圖

浩歌且醉金陵酒

樊籠雀

野雀不向山林宿如何却傍人家屋山林怕遭羅網圍
人家又恐人驅逐飲啄頻驚殊不足辛苦營巢隨養育
昨日雨狂風拔木人家屋倒巢亦覆雄悲雌泣無所施
墮地最苦黃口兒黃口羽濕不會飛啾啾草底啼渴饑
雄雌啄哺稍覺長無故又被樊籠羈雄雌劬劬繞籠飛
啄哺不異居巢時但恨不得身相依我感此情子細推

人之與物初無違安得開籠而縱之山林朝市俱無疑
廬山行送行

廬山根盤幾百里屏風九疊開畫圖浮嵐吐秀挹南斗
黛色眇眇來青湖山西石門翠如刷山東石鏡大如月
三梁倒掛銀河流六月飛花洒寒雪春風錦繡花玲瓏
彩雲盤結摩霄宮涼回紫極竹聲遠紅塵不到金芙蓉
我昔曾穿謝公屐散策曾尋謝公迹微風弄影松檜鳴
微雨弄晴瑤草碧重巒疊嶂烟淒迷剝苔掃碧尋古題

興闌回首不知處落花流水孤猿啼君作廬山遊攬結
廬山秀拂拭雙瞳人細看蓮花漏轉首白雲如雪飛廬
山面目非當時歸來舊事不須問石田水暖菖蒲肥

孤松歎

孤松倚雲青亭亭故老謂是蒼龍精古苔無花護鐵甲
五月忽聽秋風聲幽人恐爾斧斤辱獨傍孤根結茅屋
月明喜看清影搖雪凍却愁梢尾禿昨夜飛霜下南海
山林草木無光彩起來摩挲屋上松顏色如常心不改

幽人盤桓重慨慷此物乃是真棟梁嗚呼既是真棟梁
天子何不用是扶明堂

痛哭行

雨淋日炙四海窮經綸可是真英雄岐豐未黍泣寒露
咸陽草木來悲風京邦大官飫酒肉村落饑民無粒粟
東魯儒生徒步歸南州野老吞聲哭紛紛紅紫已亂朱
古時妾婦今丈夫有耳何曾聽韶武有舌不許論詩書
昨夜虛雷槌布鼓中天月破無人補休說城南有韋杜

白壁黃金天尺五

苦寒作

昨日風寒枯木折今日五更霜似雪
河伯泉仙驚怪言
凍殺深潭三足鼈南海一平行大輿
五尺之冰千古無
珊瑚樹死日色薄老翁破凍又僵魚
鳳凰不出鸛鵒語
禿鶯飛啼血如雨駝馬交馳入不毛
兜鍪不憚饑寒苦
豺狼夾道狐兔驕白草萬里蠻烟焦
紛紛赤子在魚炙
三士何緣爭二桃君不見江南古客
頗癡懶養得一雙

青白眼

送吳瑞卿歸武昌

古越古為山水府
篁竹菁菁無嘯聚
耕田鑿井各有為
文物衣冠比鄒魯
玄風已散茫茫然
幾回滄海成桑田
眼前飛走襍泉獍
草木憔悴愁無天
君來推轂洗煩毒
晝簾不動風肅肅
荆花脫洒春攸揚
一奩清透湖天綠
赤子欣欣行大道
拍手爭歌君政好
明月冷浸甘棠陰
光風碧長園扉草
三載考績鷹脫鞴
解鞍出買江上舟

黃童白叟不可留山風慘澹江風愁十里長亭正花柳
綠波翻動蒲萄酒玉笙吹徹蓬萊雲西去青山如馬走
知君住處好神仙洞庭赤壁浮紫烟武昌樊口最幽絕
東坡曾為留五年君今歸去榮晝錦水色山光緣席枕
我亦欲寫巖壑圖掛君高堂對君飲

送黃叔源之甘肅州尹

江風飄飄楊柳青江烟漠漠花冥冥春光欲灑動笙樂
潑醅弄影蒲萄傾客路迢迢平不頗應有兒童迎五馬

金川先生集卷下
文章太守今幾人風流未有如今者中原地古風俗淳
君侯撫牧仁化新黃堂無訟白日靜甘棠有陰芳草春
君侯考績鬢未改虎竹銅符轉光彩功成早向江南來
江南有人遙相待

柯博士竹圖

先生元是丹丘僊迎風一笑春翩翩琅玕滿腹造化足
須臾筆底開渭川我家只在山陰曲修竹森森照溪綠
只今榛莽暗荒烟夢想清風到茅屋今朝看畫心茫茫

坐久不覺生清涼夜深明月入高堂吹簫喚來雙鳳凰
題畫蘭卷兼梅花

湘江雲盡湘山青秋蘭花開秋露零三閭已矣喚不起
蓀蕩蕭艾春娉婷冷飈吹香散郊垌山蜂野蝶何營營
幽人脫略境色外竟坐不讀離騷經西湖昨夜霜月明
梅花見我殊有情逋仙祠前塵土清老鶴行于如人行
天邊縹緲來鳳笙玉壺美酒顛倒傾酒闌興酣拔劍舞
忽覺海日東方生

喜雨歌贈姚鍊師

今年大旱值丙子赤土不止一萬里米珠薪桂水如汞
天下蒼生半游鬼南山北山雲不生白田如紙無人耕
吾生政坐溝壑嘆況有狼虎白日行大官小官人父母
殺犬屠牛事何苟南風日日吹太空旱魃徒勤城南婦
鍊師一出役萬靈綠章上扣天帝庭乞得秋陰三日雨
洗濯山澤回餘青老農額手喜復歎點點都是盤中飯
雨我公田及我私免得殘年坐塗炭老農所見愚又愚

拜師更乞天雨珠雨珠飲彼殘暴腹庶幾活我東南隅
我方熱惱岩壑底眨眼忽聽雷過耳起來發歌登大樓
長江大河都是水

白雲歌為李紫篋作

我歌謫仙白雲歌清風飄飄吹女蘿女蘿風飛白雲出
秦山楚山爭嵯峨秦楚之山青欲舞白雲不向湖山住
忘機在我讀書窗要養貞姿歸太素滿山紅紫光陸離
白雲施施自無為奔騰洶湧作霖雨白雲悠悠若無侶



白雲在天不可呼白雲在地不可孤
卷舒變滅了無意
粲粲不受纖塵污我與白雲皆幻住
白雲與我應同趣
孤飛感我庭闈情回首青山不知處
我欲高飛洞庭船
賒月買酒邀謫仙為君喚雪梅花天
握手一笑三千年

劍歌行次韻

先輩匣中三尺水
斬蛟曾入吳潭裏
提歸未肯策奇勲
軒冕泥塗真戲耳
雞林削鐵不足比
昆吾百鍊安可齒
淬花不瑩鷗鵝膏
掉鞘却敲鸞鳳髓
憶昔破敵如破竹

帶霜飛渡桑乾曲于今繡澁混鉛刀不遇何異荆山玉
驚雷夜作青龍哭血痕冷剝苔花綠野人一見駭心目
到手撫摩看不足雪花皎皎明闌干毛髮凜凜肝膽寒
老軍疲將長慨歎願欲置諸武庫間書生無用且掛壁
引盃時接殷勤歡天眼太高俗眼頑銳鏢宜許兒曹看
先生有志不在此出處每談徐孺子清高厭覓萬戶侯
笑引江山歸畫史我未四十髻已斑學劍學書俱廢弛
五更聞雞狂欲起何事英雄心未已

船上歌

草衣老子雙髻皤拍手夜唱滄浪歌浮生不信巢穴好
賣屋買船船作家明月滿天天在水別調新歌水中起
蕭散可同甫里翁逃名不比鷓鴣夷子大兒船頭學讀書
小兒船尾學釣魚病妻未脫鄉井夢夢中猶慮輸官租
前年揚帆箕子國橋首扶桑看日浴蓬萊可望不可到
海浪翻空倒銀屋去年鼓枻遊瀟湘湘南雲盡山蒼蒼
靈均死處今尚在使我弔問空悽愴今年來往太湖曲

三萬頃波供濯足玉簫吹散魚龍腥七十二峯青入目
脫巾袒裸呼巨觥旁人睥睨笑我狂我狂忘勢亦忘利
坐視宇宙界諸郎君不見江西年少習商賈能道國朝
蒙古語黃金散盡博大官騎馬歸來傲鄉故今日消磨
等塵霧又不見江南富翁多田園堆積米穀如丘山粉
白黛綠列間屋競習奢侈俱凋殘今日子女悲饑寒嗚
呼噫嘻何如尚志富弼足求貴曷足恃秦時李斯丞相
位漢家韓信封侯貴堂堂勲業亘乾坤赤族須臾無噍

類何如老子船上閒朝看白水暮青山艱險機忘隨處
樂顧盼老小皆團圓且願殘年飽吃飯眼底是非都不
管興來移棹過前汀滿船白雪蘆花暝

吳姬曲六首

吳姬美遠山淡淡橫秋水玉纖軟轉綰青絲金鳳攢花
搖翠尾隔雲移步不動聲騎馬郎君欲飛起欲飛起樓
上閒人閒如市

吳姬來香花未動游塵開勾玉遲遲錦雲重百花掩媚

春衷裏王孫公子金無限為君一笑成飛埃

吳姬歌聲未轉歡情多飄然一曲入雲去簷前誰敢
呼琵琶珍羞如山酒如海餘聲襲人無奈何無奈何門
外春風題柳花

吳姬舞翠袖凌雲步輕舉笑回不覓錦纏頭四坐金錢
落如雨雲烟轉首無定期紫燕黃鸝對人語對人語明
年春風誰是主

吳姬醉對面接花作嬌態腰柔頸軟未成眠斜倚東風

說惟悴坐中狂客不勝情笑拍香肩呼小妹呼小妹明
日園林樹如蓋

吳姬歸湖風吹冷日色微滿船箏鼓不敢動隔林恐攪
殘花飛湧金門外馬如練銀燈照水紅輝輝紅輝輝吳
姬上馬羅綺圍

村田樂祭社圖

春風吹晴杏花雨東村西村鳴社鼓長旂翩翩導前路
樂舞于于成隊伍冠帶郎君顏貌古插竹簪花相媚嫵

可是平生慣塵土不學時人覩面目
髭髥童兒亦覩覩
騎牛老兒妄偃僂桑柘影斜山日暮
醉飽歸來同笑語
田家之樂樂如許正是太平無事處
孰知異世多官府
村樂荒涼無此舉大家役役如征戍
小家庭戚驅兒女
白日康莊猓多黔黎盡作逃亡戶
雲林叢社能識取
撫綏寧信巔崖苦按圖閱景自悽楚
誰是龔黃誰卓魯

紅梅翠竹山雉圖

游絲冉冉游雲暖翠石凝香土花短
管絃不動白日遲

可是江南舊亭館湘簾隔竹翠雨濃王姬醉染胭脂紅
文章羽毛亦自好轉首似覺懷春風去年我過長洲苑
落日淡烟芳草淺滄浪池畔野景生姑蘓臺上離情遠
今年買櫓遊西湖西湖景物殊非初黃金白壁盡塵土
朱闌玉砌荒靡蕪東園寂寞西園靜梧桐葉落銀床冷
十二樓前蛛網絲見畫令人發深省

飯牛圖

君不見百里奚飯牛而牛肥胸中經緯無人知又不見

老甯戚時不時兮長嘆息偶爾君臣稱際會伯道相高
非盛德何如牧兒原野間埋名隱姓間盤桓清晨騎牛
唱歌出日暮騎牛唱歌還隨時力作了人事豈以世故
無相干也不知長安塵土暗天地也不知滄海風黑波
瀾翻三峽之險彼自險蜀道之難彼自難富貴無所惑
貧賤得自安但願歲年豐草滿牛可餐青山綠水足行
樂吟風嘯月無機關不問世上騎馬官

盤車圖

憶昔常過居庸關關中流水聲潺潺雪花飛寒大如席
白色粲爛西南山山家野店隱烟霧水榭雲樓有幽趣
漢家封侯已消磨秦時長城作行路天險不設南北通
風俗一混歸鴻蒙今人不解古時事使我感慨心中忡
灤水城頭無苜蓿馬驢盡食江南粟八月九月朔風高
更有饑鷹啄人肉太平時節無烽塵金輿玉輦從時巡
關南關北草色新四海貢賦來相親大車連屬小車侶
雪地冰天無險阻玉帛穀粟取不窮誅求那信人民苦

書生潦倒家無儲淒涼忽見盤車圖側身悵望長嗟吁
天子亦念東南隅

壽張堂河東張仲舉作記堂乃韓子中父封壽
張尹故名子中居曹州中陶一日其父見井
泉流北即與諸子謀遷居云井水北流河必
北行乃去河六十里卜居高築其堂半年後
河果北流不遷者皆受害獨韓氏堂無恙是
歲子中奉恩封父因題之

廬陵曾記畫錦堂黼黻韓魏開忠良文章足以照千古
富貴豈止榮一鄉壽張新得河東記中陶乃是安陽裔
知幾不獨見井泉自是胸中有天地春風入簾春雨收
下堂不受黃河流綵衣諸郎舞新好奉恩歸拜髯參謀
衣冠文物能瀟灑不羨老裴居綠野山中自有宰相家
休問桃源種桃者

徙馬歎

君不見秦皇二世治天下趙高妄指鹿為馬遂令衆口

毀權奇異獸須臾滿高價東亭壯騾十萬錢西城牝驢
數百千駟驢駟入奇選犂犢買勇穹廬前三十六郡
五百萬一旦驚風墮塗炭天開雲散雨聲寒峻骨累累
秋草爛毳衣健兒牽狗車皮冒女郎郎隨橐駝將軍怒斬
白鼻騮丞相唾逐獅子花獨留款段在君側錦韉金鞍
青玉勒噴臊撼動赤墀風太僕御官愁失色痛憐物產
不偶時龍媒滅沒其誰知況無古王同爾馳相逢徒作
窮途悲吾聞天馬出西極霜蹄蹴蹋飛霹靂當年堆壁

不敢沽豈料于今供啗食庖羲已矣古道蕪何時重見
滎河圖孫陽已作飯牛客非子去隨牧羝奴嗚呼不獨
馬之委天下奇材亦如是

盆中樹

索駝已矣樹多病後世誰能諭官政盤根錯節入盆盂
豈伊所生之本性童童結蓋擁綠雲皮膚轉卷生蟲紋
幽人重之如重寶置諸座右同佳賓時時玩賞勤拂拭
要做人前好顏色自憐無路接春風慙愧荆榛得甘澤

人言此樹受恩愛我獨悲之受其害既無所資無所求
何故矯為阿媚態嗟哉木命既有虧其所玩者何為奇
君不見石家珊瑚高且貴今日根株在何地又不見李
家花木比異珍于今野草秋烟昏姚黃魏紫誇艷看
到子孫能有幾人生所重重有德耳目之娛何足齒我
知萬物各有緣胡不聽之於自然平原太谷土無限樗
櫟能與天齊年此樹那宜此中種器小安能成大用願
君移向長林間他日將來作梁棟

幽蘭詠

卷下

光風吹香洗游塵蘭花隱芳猶笑人翠露沉沉玉環冷
忘言坐視空山春幾回清夢度荆楚欲問三閭杳無所
空將幽意寄離騷暮雲淒淒湘皋雨古懷瀟灑千餘年
忠義漫作虛語傳人間蜂蝶何翩翩撫卷對花空自憐
宣和殿畫驢圖

海波激撞日月動瓊樓玉宇紅雲擁忠良不顧社稷搖
聖明忘却山河重太平將軍倦戍邊春風四海且上元

宣和殿上如市塵黔驢直到君王前黔驢之技止於是
君王用意徒為爾轉頭朔漠邊塵圍驀裊駟盡羞死
寒冰朔雪徒步趨當時客夢知何如二百年後看畫圖
令人感惻長嗟吁

過蘭亭有感

東晉風流安在哉烟嵐漠漠山崔嵬衰蘭無苗土花盛
長松落雪孤猿哀滿地斜陽似無主昏風不獨黃鸝語
當時諸子已寂寥真本蘭亭在何許歌簷老樹綠女蘿

崩崖斷壁青相磨舊時觴詠行樂地今日魚鼓瞿曇家
荒林盡靜響啄木曲水潺潺似山哭游人未來芳草多
習習餘風度空谷去年載酒誦古詩今年拄杖讀古碑
年年慷慨入清夢何事俯仰成傷悲故人不見天地老
千古溪山為誰好空亭回首獨淒涼山月無痕修竹小

有感吟

昨宵風雨多新愁亂無數洛陽城西富貴家舊時臺榭
今何處枯藤古樹棲老鳥敗垣荒草藏狐兔好花不見

春風開落花盡逐春風去遊子意何如蕩子情何訴但
見金谷流映帶郵亭路三月四月杜鵑啼往來客旅心
悽迷落日淡孤雲低不如買取數斗酒浩飲長歌高拍
手一醉之後吾何有世事紛紛付芻狗

竹齋集卷下

欽定四庫全書

竹齋詩續集

明 王冕 撰

按是稿初分為四遺失迨半七言律詩山樵
記臆默為手書五言絕七言絕一無從考於
梅之品題常多傳入畫中故不錄好事者傳
誦不少置因舉一二備夫缺畧滄海遺珠光
彩終焉呈露適爾全藁可致尚當采而補入
諸甥暨陽駱居安等敬書

七言絕句

素梅

大庾嶺頭春似海，不是尋常白玉堂。
昨夜護龍河上看，一天明月四簷霜。

樹頭歷歷見明珠，底用題詩問老逋。
且買金陵秋露白，小舟載月過西湖。

江南雪消春漸回，溪東溪西梅花開。
幽人作詩興不淺，時復杖藜携酒來。

歲寒風致少能解野草安能識此情春到玉堂渾不覺
清香踈影自分明

五雲縹緲隔蓬萊仙子吹簫月下回轉首不知春幾許
霜花如雪滿瑤臺

江南十月春色早處處梅花當水開玉笛一聲霜不小
滿天明月鶴飛來

羅浮月白海無塵玉樹瓊林處處春半夜禹陵風雨作
屋梁飛動欲生鱗

鍊石心腸滿面霜歲寒吾計未全荒相逢休問春何處
定是調羹到玉堂

不向羅浮問醉仙笑呼孤鶴下吳天春風吹散梅花雪
香滿西湖載酒船

玉雪玲瓏瘦影重不同桃李媚春風十分清致無人解
猶在舊家池館中

寒枝錯落凍不解隔水清香招得來午夜風停雪聲墮
梅花開盡不知寒

斷雲流水孤山路
看得春風幾樹花
騎鶴歸來城郭是
月明簫管起誰家

昨夜朔風吹倒人
梅花枝上十分春
老夫高卧石牕下
贏得清香入夢頻

朔風吹冷過山城
巾子峰頭雪未晴
十載西湖閒客夢
夜來山月最分明

羅浮山下雪三尺
白玉堂前春幾分
歲晏歸來詩思好
東風吹散一溪雲

老婦
疎花粲粲照寒水
瑪瑙坡前春獨回
却憶去年風雪裏
吹簫曾棹酒船來

天寒江國霜如雪
草木無情盡摧折
不知春意到江南
疎影橫斜半牕月

春風處處競繁華
桃李無言亦好花
獨有高人愛高潔
肯衝冰雪到山家

平生固守冰霜操
不與繁花一樣情
歲晏溪頭春意足
是誰看得最分明

疎籬瀟灑綠烟寒老樹鱗皴艾葉攢昨夜天空明月白
一枝疎影隔牕看

春風一笑玉無垠雲散空牕見月痕半夜鶴歸詩思好
清香吹滿水南軒

月明曾過西湖路愛看橫枝當水斜試問玉堂諸學士
幾時清夢到山家

明月滿天霜氣重梅花風韵更清妍鶴飛不帶簫聲遠
春過西泠第二船

霜花浮影月娟娟
春色無痕上畫船
轉首西湖風景異
不知誰識老逋仙

吹徹瑤笙鶴未還
小橋流水碧潺潺
夜深夢醒推牕看
白月無痕雪滿山

鵝州城東古梅樹
鱗甲滿身如老龍
冷霜極冷欺不得
春風吹作玉玲瓏

記得西泠春色歸
珠星璧月景離離
近來消息真堪笑
却說梅花不要詩

開遍南枝又北枝春風於我似相知
酒邊漫說羅浮夢忘却瑤臺月下時

十月中原風景別寒氷如地雪漫天
相逢盡說江南好處處梅花壓酒船

溪谷氷霜春到遲老夫長夜只吟詩
憑誰說與中朝士此是江南第一枝

瑤坡前春未幾番空棹酒船回西湖
今日清如許一樹梅花壓水開

瀟洒山林慣雪霜不同桃李競芬芳何緣作得春風夢
一夜吹香到玉堂

此心如鍊蘊陽和不得春風也自花何自高人愛瀟洒
夜深踏雪到山家

鍊石心腸冰雪顏逢時亦有好花看玉堂可有青氈舊
不畏風霜入骨寒

千年萬年老梅樹三花五花無限春不比尋常野桃李
只將顏色媚時人

霜氣橫空水滿川
梅花枝上月娟娟
却思前載孤山下
半夜吹簫上畫船

夜來漫踏前村雪
雪裏梅花認得真
回首中原天萬里
瓊林玉樹一般春

一樹橫斜白玉條
春風吹亂雪飄飄
孤山老却林和靖
多載笙歌過六橋

瘦鋏一枝橫照水
疎花點點耐清寒
雪晴月白孤山下
幾度清香拄杖看

今日開門見遠山
鍊師壇下列清班
看來都是梅花樹
箇箇春風玉佩環

樹陰如屋霧如潮
淺水流花落野橋
忽憶去年秋八月
玉霄峰頂夜吹簫

仙子歸來夜未央
瑞香風動翠羅裳
月明無處韜清影
簫管迎春上玉堂

海雲初破月團團
獨鶴歸來夜未闌
一片笙簫湖水上
玉妃無語倚闌干

雲間古寺陸機宅草木蕭森鶴不來惟有溪頭老梅樹
霜花猶是舊時開

三月春風吹雪消湖南山色翠如澆一聲羌管何人見
無數梅花落野橋

閒花野草鬪青紅一著冰霜掃地空惟有老梅標致別
歲寒時節自春風

地老天荒儘可花不同桃李競繁華要知鼎鼐調羹味
須問舊時丞相家

和靖門前雪作堆多年積得滿身苔
踈花箇箇團冰雪羌笛吹他不下來

墨梅

老仙醉吸墨數斗吐出梅花箇箇真
相見莫嫌顏色異山林別是一般春

面皮如鍤慣風霜焉肯托根桃李場
轉首江南春似海一聲簫管月蒼蒼

我家洗硯池頭樹箇箇花開淡墨痕
不要人誇好顏色

只留清氣滿乾坤

莫厭緇塵染素衣
山間林下自相宜
玉堂多少閒風月
老子熟眠殊不知

紅梅

夢回詩思不可遏
赤腳溪頭夜踏冰
忽地風來明月動
彩鸞飛出碧雲層

顏色雖殊心不異
漫隨時俗混繁華
清香吹散乾坤外
不是尋常桃杏花

老梅標致何瀟灑不與尋常草木同可笑燕山人事別
春風只看杏花紅

翠華影轉宜春苑苑裏紅梅一夜開學士賦詩承賜宴
內官傳道着緋來

和羹風致誰能解箇箇花開耐歲寒五月燕山木黃落
相逢只作畫圖看

白日遲遲照牕戶深院不知春幾許紫簫聲轉香風回
隔簾踏動燕脂雨

十二闌干一院花
春風猶憶舊京華
翠雲不隔西湖路
夢入咸平處士家

洞天窅窅無人到
白日丹光出樹林
仙子竟忘食玉法
笑迎春色綠雲陰

彩鳳穿花啄石苔
玉牕瓊戶紫烟開
山人不說羅浮夢
却憶玄都觀裏來

桃杏漫山總粗俗
舊家池館尚春風
道人不作羅浮夢
坐看珊瑚海日紅

山林養得寸心丹豈是清香不耐寒今日春風好顏色
任他自作杏花看

玉妃步月影毵毵宴罷瑤池酒正酣半夜不知香露冷
春風吹夢過江南

昭陽殿裏醉春風香隔瓊簾映淺紅翠袖擁雲扶不起
玉簫吹過小樓東

羅浮仙子醉春風玉骨冰肌暈淺紅一味清香消不盡
幾回飛夢錦雲中

仙子歸來逸興賒夢中猶說舊繁華
春風轉首情何已
却向江南認杏花

仙子雲中駕鶴歸翩翩霧佩曉風吹玉肌
輕染燕脂色
恰似羅浮夜醉時

滿湖水色淨娟娟正是春風二月天
醉後不知雲入屋
燕脂飛雨墮樓船

玉骨清癯怯素粧春風一醉九霞觴
綠房午夜嬌雲煖
不夢梨花夢海棠

昔醉西湖處士家
酒痕吹上水邊花
東風蛺蝶迷香夢
一樹珊瑚月影斜

五言絕句

梅花

林下見清真
草衣如野人
開花冰雪裏
豈是不知春

二

清苦良自持
忘言養高潔
夜靜月明多
開門滿山雪

三

十月霜風寒山木俱摧折獨此冰玉姿照影清溪月

四

故人江海去相隔萬重雲歲晚思無已梅花可寄君

五

何處尋春信江南路渺漫夜深山月白踈影隔牕看

六

老幹漬清霜寒梢掛新月徐徐暗香來可是春機泄

七

疎枝照清淺一見興何饒記得春風夜題詩過斷橋

八

仙子步輕盈泠泠玉佩聲羅浮烟水遠詩夢不勝情

九

冷艷凝輕露清香度晚風如何冰玉質却學小桃紅

十

深院春無限香風吹綠漪玉妃清夢醒花雨落燕脂

十一

湖上春何在羅浮夢已空清香入書屋不是杏花風

十二

庭院春日遲風回翠鸞舞誰倚玉闌干搖動燕脂雨

十三

不作桃李態山林別是春但令心似鏡何慮惹緇塵

十四

面墨已無情豈但心如鏡昨宵踈影橫空山半牕月

六言三首

肯同凡卉爭妍自與高人索笑他年鼎鼐調和不改山林節操

瀟洒托身溪谷清高不染紅塵數點幽花的皪包藏萬斛陽春

不同楊柳爭妍冷笑托根泉石歲寒寄語高人可問調羹消息

七言長句

朔風吹撼處士廬凍雲隔月天糝糊無名草木混色界

廣平心事今何如梅花荒涼似無主好春不到江南土
羅浮山下蘼蕪烟瑤瑤坡前荆棘雨相逢可惜年少多
競賞桃李誇豪奢老夫欲語不忍語對梅獨坐長咨嗟
昨夜天寒孤月黑蘆花捲風吹不得髑髏夢老披蒙茸
黃河萬里無顏色老夫瀟洒歸巖阿自鋤白雪栽梅花
興酣擊劍長嘯歌不問世上官如麻疎枝錯落花燦爛
正似推蓬溪上看凍痕不剝五更霜蘚色猶存百年榦
孤山處士詩夢寒羅浮仙人酒興闌天荒地老行路難

誰傳春色來人間君不見江南物色今匪昔大谷長林
盡荆棘歲寒何處論襟期坐對雲山空歎息東樓女兒
白苧歌西樓美酒喚杏花總有高人愛高潔踏雪誰肯
來山家老我無能慣清苦寫梅種梅千萬樹霜清月白
夜更長每是狂歌不歸去只今潦倒霜髯垂世情恬澹
俱忘機讀書寫字两眼眇斷白搔墮隨花飛轉首江南
隔塵土白月流光雙鶴舞一聲羌管過南樓缺石心腸
亦悽楚安得喚起陳元龍長船滿載玻璃紅浩歌拍拍

隨春風大醉驚倒江南翁

又

江南十月天
雨霜人間草木不敢芳
獨有溪頭老梅樹
面皮如鑲生光芒
朔風吹寒珠蕾裂
千花萬花開白雪
彷彿瑤臺羣玉妃
夜深下踏羅浮月
銀鐺冷然動清韻
海烟不隔羅浮信
相逢漫說歲寒盟
笑我飄流霜滿鬢
君家白露秋滿缸
放懷飲我千百觴
氣酣脫穎恣盤礴
拍手大叫梅花王
五更窓前博山冷
么鳳飛鳴酒初醒

起來笑揖石丈人門外白雲三萬頃

又

朔風吹寒脫繁木石溜潺潺出空谷荒村野店少人行
獨有寒梅照寒渌玉質皦皦無纖埃春風不來花自開
平生清苦能自守焉肯改色趨樽罍我與梅花頗同調
相見相忘時索笑冰霜歲晚愈精神不比繁華易凋耗
長安多少騎馬郎尋芳競集桃李場東家買酒西家嘗
引得世間蜂蝶忙

又

昔年曾踏西湖路，巢居閣上春無數。
雪晴月白影精神，瑤坡前第三樹虬枝屈。
鍊交碧苔，踈花暝送珍珠胎。
初疑羣仙下，廖廓瓊瑤玉珮行。
瑤臺又疑幽人在空谷，滿面清霜鬢華綠。
迎風冷笑桃花紅，綠紛紛太麓俗。
今年來看秦淮水，路隔西湖一千里。
草堂上是白雲窩，夜半松風喚子起。
青山隔世無游塵，雲根粉壁光如銀。
長嘯一聲月入戶，孤山處士來相親。
江南梅花自有主。

休問當年何水部山僧對我默無語
栢子無風墮青雨

梅先生傳

先生名華字魁不知何許人或謂出炎帝其先有以滋味干商高宗乃召與語大悅曰若作和羹爾為鹽梅因命食采于梅賜以為氏梅之有姓自此始至紂時梅伯以直言諫妲己事被醢族遂隱迨周有標有始出仕其實行著於詩垂三十餘世漢成帝時梅福以文學補南昌尉上書言朝廷事不納亦隱去變姓名為吳市門卒

云自是子孫散處不甚顯漢末綠林盜起避地大林大將軍曹操行師失道軍士渴甚願見梅氏梅聚族謀曰老瞞垂涎漢鼎人不韙之吾家世清白慎勿與語竟匿不出厥後累生葉葉生萼萼生蘂蘂生華是為先生先生為人修潔灑落秀外瑩中玉立風塵表飄飄然真神仙中人所居竹籬茅舍洒如也東西行者過其處必裴徊指顧是梅先生之居勿剪勿除溪山風月其與之俱乎先生雅與高人韻士遊徂徠十八公山陰此君輩皆

歲寒友何遜為揚州法曹掾虛東閣待先生先生遇之甚厚相對移日留數詩而歸唐丞相宋璟平生鑄心石腸不輕為人題品獨為先生賦之其見重如此天寶大歷間杜甫客泰山邂逅風雪中巡簷索笑遂為知心每語人僕在遠道無可人與語得梅先生少慰焉甫為一代詩宗心所賞好衆口翕然於是先生之名聞天下清江成都羅浮庾嶺孤山石亭野橋溪路之濱山店水驛江岸之側遇會心處輒婆娑久之好事者爭攀挽過其

家甚至圖寫其象朝夕瞻玩或以油牕土屋屈致先生
將之射利先生亦為開心吐露人為先生嘆非其所先
生曰苟不盤根錯節安能以別利器知先生者敬愛愈
重錢塘林逋眉山蘇軾咸以詩歌美之蓋凡欲以片言
行者必託先生藉口苟非先生之為容則語言無味百
世之下聞其風而高之王沂公曾居要路持魁柄高下
人物許在百花頭上繇是緋綠累累至于今不墜先生
性孤高不喜混榮貴以酸苦自守忽一夕聞高樓羌管

聲乃悽然有感吾不能學桃李輩趨時故際窮年風餐
雪虐零落如此奚憾焉嗚呼梅自大林之後曠數百載
無聞人由唐至宋稍流派蕃衍分南北兩支世傳南暖
北寒先生蓋居於南者也先生諸子甚多長云實操行
堅固人謂有父風味異居南京犀浦者為黃姓其餘別
族具載石湖世譜太史公曰梅先生翩翩濁世之高士
也觀其清標雅韻有古君子之風焉彼華腴綺麗烏能
辱之哉以故天下人士景愛慕仰豈虛也耶

送僧住院

愛名山入剎便須擲鉢錫高飛傳臨濟正宗底用着金
毛大吼佛至於今我輩何如嘆鳳凰不似鷓鴣看款段
貴於騏驎只合隨緣去住無勞較論短長某雪月襟懷
據天寧第一座虎嘯風生遊湖上二十年到這裏張其
綱紀施于禮義豈在大小之殊自可等倫迴絕光輝
蓮社振作吾宗四時錯行有冬有夏日月代明有晝有
宵草堂昨夜雨初乾今日南山翠相亞蒟蘆藤上忽結甜瓜韭菜

根頭新生苦蕒有樹無花無花有果何者是真何者是
假草露水光電生石火你問何如我道恁麼咄鮎魚跳
上竹竿頭胡孫睡在崩崖下看他只是尋常惡

邵澤步渡船疏

泌浦湖納百川源流乃東南溪山之臟腑邵澤岸通三
江潮汐入西北水道之咽喉正當十字路頭豈比三家
村裏往來客子常懷不測之憂貧賤農人每起有餘之
念架飛梁難尋巨木造扁舟不費多錢富長者若用心

機小梢工何辭氣力白浪港中平地過底須問水淺水
深綠楊陰裏便撐來何必論天昏天曉

竹齋集卷續

故山樵王先生行狀

山樵諱周字師文其先關西人系出猛之後十世祖德元仕宋官至清遠軍節度使靖康播遷留守建康移鎮浙東未幾仍守建康策勲追贈太師威定公威定之子諱琪閬州觀察使廟賜忠節偕武節大夫第三子也第八子某諸軍統制教練使居諸暨勅葬長寧小溪山是為諸暨初遷之祖孫文炳割田園山業頃畝凡若干資之慈光梵刹香火焚修族屬蕃衍世有聞人曾大父來

清白傳家隱居善積多聞考山農先生性資豪邁馳聲
區宇間山樵幼穎悟六歲通論語孝經大義少長過目
即成誦侍父山農先生經涉河山之美迨乎文物之盛
克廣心志造詣益深至正甲午來元運日促移家九里
山中種蒔梅竹從容後先國朝兵下衢婺山農建長策
期至太平天竟奪其算區宇再造既述職方肇修先緒
占籍會稽簞瓢陋巷人不堪處賡歌擊節其樂也愉愉
數奇偕寡達生自分寫梅師法家傳溪橋斷岸老幹疎

花吟歎盤礴顧瞻忘返人目其迂落筆伸紙神領意會
不知生意自毫端出迄今世家蓄名畫購之有不可得
殆若古今治忽山川經由辭藻賡唱扣之若河決若燭
照赫如前日事論辨精剴人無一辭可更學宮鄉飲推
讓賓席士類耆儒尊仰郡守以下風采景慕禮遇接見
優加作作尚平淡直而婉簡而奧藁藏於家平生清淡
自將觀化之日口占一絕云清風明月今宵好相伴逋
仙老鶴閑瞑然而逝其孤昭念塚上未有石介姻友駱

氏則民行實為請余家居連閭巷山樵為執友行次感
舊懷今論次有自山樵生于元至正乙亥秋七月二十
二日卒于永樂丁亥正月十三日以疾終于正寢壽七
十有三配周氏世家蕭邑鄉曰昭鴻有賢行先卒子男
即昭孫男長璵任建寧府學訓導次驥驎驥驎孫女永
貞適諸暨駱大年孫曾繩繩家學源源習熟葬用明年
夏四月二十一日卜地鄉香爐山之原配周氏合祔嗚
呼山樵君子儒也阨窮而守益至持操而志益充衣冠

偉望處鄉里恂恂然遵養時晦不忤不求人孰不為致
重乎立言君子揭銘擣光導揚潛德納諸玄堂庶傳永
久六大理左少卿致仕山陰呂升狀

書竹齋先生詩集後

竹齋先生詩集者諸暨駱稱大年之所彙粹者也先生
世諸暨人名冕字元章竹齋其別號豪放不羈士也其
為人槩具學士宋公所撰王冕傳謂馬不覓駕不足以
見其奇才冕亦類是夫子又聞之先生善寫梅自成一
家其法則出入楊無咎平生愛讀周禮探其微嘗著書
一卷曰吾不死持此遇明主伊呂事業不難致也值元
季視時政不綱負氣懷憤則出言無所顧忌率多譏刺

其任事之人致人目之為狂豈真狂者哉走四方其足跡殆半天下志無所遂追謁太祖高皇帝于金華與語頗合獲留餉午具惟飯一盂蔬一盤先生且談且食盡飽乃已拜上喜曰先生能甘粗糲如是可與共大事即授以諮議叅軍未幾遘疾遽亡知之者謂使天假之以年其樹功烈當不在元勲之下是知其詩為先生餘事耳況其大篇短章豪雄俊偉汪洋浩瀚酷似其為人故誠意伯劉公嘗序其集曰其言有忠君愛民之情去惡

拔邪之志懇懇惻惻見於詞意之表誠得先生之心者也其集甚富惜厄兵燹不全其今年所集僅能收拾於煨燼殘缺之餘蓋千百而什一也是則先生之手澤尚存亦可謂之不死矣大年實先生之曾孫壻端愿謹慙有文有藝子三人居安居敬居恭亦讀書尚禮稱其家兒談者謂其父子所得皆出於尊人溪園先生之教溪園今年幾九十篤厚君子博學能文嘗出粟助有司賑恤貧困奉璽書旌為義民以彙粹是集不沒先生之


善而觀亦駱氏義舉之一端云溪園名象賢字則民故
併識之資善大夫南京吏部尚書致仕蕭山魏驥書

書竹齋先生詩集卷後

是集之傳實先生曾孫壻駱大年之所自也大年端介
愿慈儒素自居雲栖乃別號婦王字永貞從大父山樵
翁筭而命之壺彞素率配德警誡無違子三人長居安
次居敬居恭閑習詩禮雍雍氣誼之間居敬梅之墨妙
亦精其尊人溪園先生博學擅古文辭山樵為忘年交
遺稿刊刻深切于衷溪園嘗輸粟貸貧民奉旨以義民
旌淑預光祿酒饌采輯諸暨志工費毋溷於人書成大

家贄見具醴醢悉拒絕之狷介若是非義而何逮若婦
王保佑其家世其竹齋遺藁輔相克觀厥成行無攸遂
賓敬有儀重山樵十年乃字之得人竹齋襟懷曠絕矯
時慢物嘗曰士生天地間苟不以道德功名顯亦當文
翰傳後何得生無益而歿無聞焉諸孫武昭克能佩服
斯訓凡諸述作無不記憶叩之朗然成誦慨古懷今蕭
然吟詠自若明日鐫無粟煮不暇論事殊世異幾及百
年雲栖相謂興起休烈導揚篇簡具載刊置九原可作

平生志願酬矣懲勸風刺措諸言辭之表人得而見矣
詩凡三卷并諸首簡誠意伯青田劉公基出處詳悉并
載太史金華宋公濂訓導諸暨張公辰傳中予也與王
氏居連里巷山樵為執友行侍席聽講常多重以溪園
文字交好斷金之誼姻親之往來詳于見聞高山仰止
書成渙乎一新因不辭而書之詩曰心乎愛矣遐不謂
矣其斯之謂乎景泰七年歲在丙子二月既望郡人白
圭書



居安等謹按外氏家世累膺武功顯擢迨及我外
曾祖父山農先生由儒發身奕葉相仍一畝之宅
清約自處集義養浩聲利一無動於心具載傳序
中俯念吾母極孝慈撫諭我兄弟嘗曰我先世竹
齋遺稿必將鐫刻酬我祖父志顧歲月于邁因循
何哉幸我堂上垂白之祖昔與我外祖父山樵先
生締交推及是心為心中命於下吾父厥志順承

居安
日與諸弟

居敬居恭

校讀刊詳芳聲麗澤從

容乎其間樗散之木因山之高百尋可致顧

居安

等學業無成揚名顯親徒切于懷又無從倣昔人
成其宅相之榮自勉自顯中焉忸怩詩分三卷從
遺藁編次未備者期之采補書板收藏來者時加
局鑰勉旃工墨之費日廣其傳當與士君子共之

諸孫駱

居安

等百拜謹書